



Tir Yimiyim



Sanjay Singh-i WFI tir election kokogo



North Korea lenir Kim Jong Un-i nuclear amshitsü amokmeren

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7

VOL. XXI NO. 75 (ADOK 75)

DIMAPUR

ROGONÜ (FRIDAY)

LUCHII (DECEMBER) 22, 2023

₹ 5.00

Lok Sabha nungi ano MP asem suspend sütsü, ajak senteper 146 kumogo

New Delhi, Luchii/December 21 (Agencies): Tim masüba yimya amshiba mechi Lok Sabha nungi ano Opposition MP asem suspend süja, tang tashinung khen asoshi züngsem nungi anenja atar nisung 146 kumogo. Brehostibarnü anentsürtem ya Congress MPs Deepak Bajj, DK Suresh aser lenir tejen Kamal Nath'er jabaso Nakul Nath alitsü.

Lower house nungi khen asoshi anentsüba MPs 100 jungogo. Yashi MP ana anenja liasü.

Lok Sabha nung sentong tagidak lia nisung anati miima smoke bomb tem bener aita makmakshimakkadja security tashi maitba atema Union Home Minister nungi sangdong agütsüsüla ta Opposition temi akhang tenzükbä sülen züngsemtem anentsüba ya tenzükbä.

Iba ken o ya sorkar aser Opposition asoshi mangatetep adokba tesem ka kumogo, talisa Trinamool Congress MP temi Rajya Sabha Chairman aser Vice President Jagdeep Dhankhar jiloshi aiba sülen mangatetep tali akum.

Tongtipang bill tem junga mejembi agizüktsü asoshi sorkar tasa ka ama MP tem khen asoshi anentsür, ta Opposition temi aitsür.

NACG-EVAC & CINI ajanga ayongzükba sentong nung Naga tsür ka aden



Kolkata nung December 19, 2023 National Consultation sentong nung Manang B. Phom-i shilem agidang tangokba noksa nung angur.

Dimapur, Luchii/December 21 (TYO): National Action Coordination Group- Ending Violence Against Children (NACG-EVAC) aser Child in Need Institute (CINI) ajanga Kolkata nung December 19, 2023 nü "Environment and Climate Change: Impact on Children" onük nung National Consultation sentong ka ayongzükba liasü.

Iba sentong nung state 12 nungi tanur 40 dak tema tena liasü.

Nagaland tenung nung Assam Rifles Public School, ARTC 3rd Mile, Dimapur nungi Grade 6 nung azünger Manang B. Phom-

Opposition telok nungi Parliament nung züngsem ya asemsü nung shilem ka dang kumogo aser yashi Lok Sabha nung junga jembishinü mesüi criminal laws alemyia bill asem agizükogo. Opposition temi ibai linük asoshi maksü lir ta ashir.

Brehostibarnü khen asoshi anentsüba MP temi Delhi tiyong nung Parliament ki nungi Vijay Chowk tashi longkak aita jaja aser sorkari parliamentary democracy agiener ta tai tongloktüsü.

"Security tsütsü tapok apa. Minister ka ama pa (Union Home Minister Amit Shah) mapa shidak inyaktüsü melenä Parliamentary democracy mezüngmeshia House nung nokdaktüsü memulunger, koba pa mapa lir, saka danga leni oa House nung pai ya shila ta osang balala sangdonger," ta Shashi Tharoor-i ashi. Congress lenir Shashi Tharoor ya Parliament züngsem nungi khen atema anenja lir.

"Onoki angatetbabo, sorkari kechi inyak, aji tim masü. Iba ya ajanga Parliamentary democracy akumtsübotsü tejangraba maliba sayur. Parliament züngsem temi Home Minister arua iba ken o jembitsü akhang, saka parnok züngsem nungi ang anentsü," ta Tharoor-isa ashi.

i Nagaland Alliance for Children and Women Rights (NACWR) teyari nung dena liasü.

La ya Dimapur nung October 26, 2023 nü agiba State Consultation nung dangar tanur 36 den külemi shilem agia liasü, koba "State Consultation with Children on Environment and Climate Change" omen kübok NACG-EVAC ajanga sponsor süa liasü.

Tzü-mopung melenba ajanga la ama tanurtem dak kongshiba indang Manang-i jangja-jangja lemsatepa liasü.

La meina NACG-EVAC India indang executive member N.K. Keny oa liasü.

State nung tejakleni kanga kerarenloka aoba district ji Phek ya lir: CM Rio



Phek District kum 50 ajungba sentong December 21, 2023 nü Phek Town Local Ground nung agidang Chief Minister Neiphiu Rio-i jubilee souvenir sayatsüdang tangokba noksa ka yangi angur.

Dimapur, Luchii/December 21 (TYO): Phek District kum 50 ajungba sentong December 21, 2023 nü "Transcending in Truth" omen kübok Phek Town Local Ground nung agia liasü. Iba sentong nung tesemdang tongti ama Nagaland Chief Minister, Neiphiu Rio dena liasü.

Iba sentong nung jembidang, Nagaland nung tejakleni tajungtiba nung renloka aoba district ji Phek ya lir aser district nung shisaliok aser saisapong tsütsü teimla tulu lir, ta CM Rio-i ashi.

Pai meranga inyaker aser ochishirtem tushia jembi aser national aser international level tem nung takok anguba shia liasü. Pai Chakhesang kin aser Phek District ajunga dang lenla balala nung tajungtiba jenjang ngutettsü asoshi maneni inyaktüsü ajungshia liasü.

Iba sentong nung Nagaland Chief Minister-i kum 50 ajungba

nüngshilong ka semzüktüsü aser Phek District 50th Anniversary Souvenir sayaja liasü.

Sentong nung adener pela agizükba o jembidang MLA aser programme committee convenor Kuzholuzo Nienu-i mezüngpur aser tesüiba mapang chief minister inyaka arurtem dang pelaba lemsatep, shirnoki district terenlok asoshi shilem agia liasü.

Ki o jen terenlok asoshi Nienu-i tang teinyakdak Chief Minister Neiphiu Rio nema tenüngsang agüja liasü.

Tsürabortem, mezüng tenzüker aser civil society temi iba alizüng tongtettsüsa shilem agiba atema Minister, Power & Parliamentary Affairs, K.G. Kenye-i pelaba ashi. Sub-division nungi district tentettsü asoshi tenzükbä atema pai ketdangsrtem danga pelaba lemsatepa liasü.

Iba sentong nung Pochury

Hoho tir Chonpa Jury, Chakhesang Public Organisation tir Vezuhu Keyho, MLA Dr. Neisatuo Mero; MLA & Advisor, New & Renewable Energy and NSDMA, Z. Nyusietho Nyuthe aser MLA & Advisor, CAWD and Taxes, Kudecho Khamo nung temi o jembia liasü.

Iba sentong nung menden ya Deputy Commissioner Phek, Kuko Mero, NCS liasü aser paisa sentong tembanga jembi. Iba sentong nung Rev. Dr. Chekrovei Cho-o ajanga sarasadem, Jubilee Choir (Phek Town Baptist Church) aser Nievolu Soho nungeri temeja ken aten aser Pochury Hoho ajanga sobaliba ken aten.

Cultural Exhibition nung Lighting of the Anniversary Bonfire, Anniversary Fusion aser tenüngsang agüja Pochury Baptist Church Council nungi Rev. Rumatho Nyusou-i sarasadema liasü.

COVID indang JN1 variant ya tetsübutsü mali: Meghalaya health minister

Shillong, Luchii/December 21 (Agencies): Tang India nung jatetba COVID indang JN1 variant ya tetsübutsü mali, ta Meghalaya health minister Ampareen Lyngdoh-i Brehostibarnü ashi.

Tang tashibo COVID strain tasenba ya tetsübotsü kangabo mali, ta lai ashi.

Tawa union health ministry ajanga COVID variant tasenba ya tetsübotsü kangabo mali ta sangdongogo, ta Meghalaya health minister-i ashi.

Meghalaya nung ICU yipten aser oxygen supply peria lir aser tebilemstü kangabo masütsü südi ta amanger, ta lai ashi.

"Pandemic mapang ama tebilemstü kanga tulubo masütsü südi ta amanger, ta Meghalaya health minister Ampareen Lyngdoh-i ashi.

"Iba variant ya talisa immunity ajema alir dak meteter ama ni angateter."

"Anungji temang anema malirtem pei sasa kumdanga alitsüla," ta lai ashi.

India nung JN1 COVID variant tenzükbä sülen Brehostibarnü kisung nunga active cases 2669 liasü.

Iba variant ya Kerala, Maharashtra, Jharkhand aser Karnataka nung tali pokteta lir.

JN1 (BA.2.86.1.1) variant ya

2023 kum tatemlen adok, koba coronavirus indang BA.2.86 lineage (Pirola) nungi jakzükbä lir.

Bodhbarnü Karnataka nung COVID-19 tashidak den sendaktepa nisung ana asüba osang lir. Ajisüaka tang tashi tasüba ya sub-variant JN1 ajanga asü masüar memetet.

Linük COVID cases tali akumba ajanga mozüki tem tali saksalema kumogo.

World Health Organisation ajanga JN1 ya "variant of interest" balaka lir, kechiaser iba variant kanga kera prokshia aor, saka global public health risk ajema lir ta ashir.

Union Law & Justice Minister-i Manipur mepetmesü reprangtsü ashi

Imphal, Luchii/December 21 (Agencies): Union Law and Justice Minister, Arjun Ram Meghwal-i Manipur tensa mejungu aliba reprangtsü ta ashi.

Republican Party of India (RPI) Athawale indang national secretary Thounaojam Maheshwar-i ashiba agi, pai Bodhbarnü Union Minister den New Delhi nung pa indang office nung ajurupedang iba o ya ashi.

Thounaojam Maheshwar-i X (Twitter) post ka nung ashiba agi, "Yashi (December 20, 2023) ni Union Law and Justice

Minister Arjun Ram Meghwal den Manipur tensa asoshi ajurutepa liasü. State nung nüburtem timba temzüng-ozüng sülen anidaker lir aser longkak aitba sentong tilateri dang aliyonga ozüng amshirtemi itemji aziüoktsü renemer dang alir aser tanü tashi aziüoka ayur ta ni ashi. Iba tensa tenzükbä indang ni pa dang ashi."

"Saka Kuki nunger timba aliba tesemtem nung parnoki ajak aziüoka lir. Union sorkar den Suspension of Operation (SoO) tezüngzüktep agiba kübok Kuki

telungpuri par inyaknüba inyaker. Parnoki mulunba mapang injang khaloktsür. Parnoki mulungba mapang nüburtem dak tenük yoker, parnoki mulungba mapang highway mokdang. Anungji iba tetetzü kechi?" ta pai ashi.

Iba atema pai Union minister dang tensa asadanga Kuki telungpur den SoO agreement agia aliba agientsü ajungshia liasü.

Kanga junga anga ataba sülen Union minister-i mepetmesü reprangtsü langzü, ta Maheshwar-i ashi.

Wokha District Hon Jubilee mungogo



Dy. CM, Y. Patton aser tanga ketdangsürtemi jubilee nungshilong sayatsüba noksa nung angur.

Dimapur, Luchii/December 21 (TYO): Wokha district kümteter küm 50 ajungba Hon Jubilee mung December 21 nü Wokha local ground nung mungogo, kong Deputy Chief Minister of Nagaland, Y Patton alakteta jaoker liasü.

Sentong nung o jembiba mapang Deputy Chief Minister Patton-i, district tentetsü asoshi mezünpurtemi bendanga agüja inyakba aser nukla tajung ayuba atema parnok nem tenüngsang agütsü. Paisa, tarutsü tajungba ka asoshi yimji yimjung aser telongjem nungdakba lemsatepa liasü. Patton-i, Wokha district nung lezmükja aliba ketdangsür ajak dang pei mapa nendaka inyaksü aser district terenlok asoshi teyari agütsütsü ayongzüka liasü.

Sentong nungsa Advisor for Agriculture, Mhathung Yanthan-ia, küm 50 ajungba ya

koda tongtibang iba indang lemsatepa den ajak longjemer tejakdangi aotsü ayongzüka liasü. Paisa, rongsenketzüng terenlok, sobaliba wazüka ayutsü aser ajak asoshi education system ka benoktsü atema tebilemba kar lemsatep.

Kasa mapang nung MLA Achumbemo Kikon-i, Wokha district-i taoba küm 50 tsüngda ajangzüker alibatem bilemtetshia jembiba aser Lotha nung asoshi dang masü saka Naga nung ajak atema tali bendanga agüja inyaksangshitsü ayongzüker. Pai, lokti tajungba ka asoshi ajaki mapa tajung inyaksü ajungshia liasü.

Maneni MLAY. Mhombemo Humtsoe-i, Lotha nung aser Naga nung ajak ajungkettsü atema bendanga agütsüshitsü ajungshia liasü.

Sentong nung S.S. Ezung, Ex-MLA, tir LOA K. Libathung

Lotha, IAS, Chairman Lotha Hoho Er. Mhondamo Ovung nungeria o tatsütsü jembiba.

Hon Jubilee sentong nung Deputy Commissioner, Wokha Ajit Kumar Ranjan, IAS-i lokti pela agizükba o jembiba, Thunglamo Ngullie aser Zareni C Kithan nati ken ka aten aser M. Rhombemo Murry-i Wokha district atema mejeta sarasademja liasü.

Sentong nungsa Senthan Cultural group Longsa, Lotsu Cultural group, aser Golaghat Cultural group nungeri sobaliba ken tena liasü.

Kasa anogo alakteta jaoker Y. Patton-i, Wokha DC office compound tasenba nung nungshilong sayatsü. Jubilee sentong nung taoba Wokha Deputy Commissioner tem, Wokha district nungi Ex-MLA tem aser tanga ketdangsürtemi shilem agia liasü.

Naga Hoho-i Christmas benjung salem lemsatep

Kohima, Luchii/December 21 (TYO): Naga Hoho-i sangdong ka ajanga Christmas tepela salem lemsatepogo. 2023 küm tembanga arur aser Christmas tanüla aser benjung mongpu ajaklen lir. Iba ya nukjidong atalokba aser asendenshir lenla ajak nung terenlok asoshi bushisüngdanga sensaksemba mapang ka lir, ta kasa sangdong ajanga

metetdaksü.

"Asenoki asen tangatetba tanüla asüngsashiti aser temeim osang prokshidi, asen kinungertem, medemertem aser nüburtem dang nangzüka ataloktsüdi. Asenok ajaki taitoktepa tesendaktep raksar aliba yanglushidi," ta Naga Hoho General Secretary K. Elu Nandang-i ashi.

Taküm Christmas ajanga

asenok nem meimtsü aser kati ka dang tai atoktsü atema tashi agüjang aser longjemer küm tasenba nung tetsükdaksü tasentem kokteta aotsü asoshi mangdang ulushidi, ta paisa ashi.

"Tsüngremi asenok nem shisatsü aser tangatetba agüjang aser asen taküm nung tajungtiba Christmas mungdi," ta pai ayongzüker.

Phek Deputy Commissioner Office Complex semzüko



Dimapur, Luchii/December 21 (TYO): Phek nung Deputy Commissioner indang Office Complex December 21 nü semzüko. Iba sentong nung Chief Minister Neiphiu Rio alakteta jaoker liasü aser pai commemorative plaque sayaja liasü.

Sentong nung o jembiba

mapang pai, Phek district kümteter küm 50 ajungba atema tenüngsang agütsü aser Deputy Commissioner Office Complex amenoktsü asoshi MLA tem, CAWD department aser tribal lenirtem longjemer inyakba atema tenüngsang agüja liasü.

Paisa, iba office ajanga tekübokba jenjang nung

terenlok bener arutsü atema tongtibang shilem agia nüburtem tenzüksü imlaja ataba lemsatepa liasü.

Iba sentong ya Deputy Commissioner Phek, Kuko Mero lenisüba nung agi aser Asst. Chief Engineer, CAWD, Er. Sungtiba Amer-i Technical Report agüja liasü.

December 24 nü 'National Consumers Day' amungtsü

Dimapur, Luchii/December 21 (TYO): Kümshia December 24 nü 'National Consumers Day' amunger aser iba anogo ya kechiba kanga tongtibang ta süra 1986 küm December 24 nü India tiri Consumer Protection Act, 1986 agizüktsü temelaba agüja liasü.

Consumer Protection Act, 1986 ya linük nung consumer movement nung otsütsüsa tongtibang alizüng ka ta züngshir. Tanü Consumer Protection Act, 1986 ya Consumer Protection Act, 2019 agi melenogo.

Kümshia iba anogo amungba ajanga consumer movement ya koda tongtibang

iba indang tangazükba agütsütsü aser consumer tem nem parnok temeden aser khuret tem angatetdaksütsü asoshi maongka agütsür. Consumer tem temeden aser tinyaksü indang tangazükba ya yimdak yimtsüngtem nung talisa agütsütsü nungdaka lir aser iba ya ajak khuret aser talisa sorkar agency tem khuret lir. Consumer tem ajungkettsü aser parnok temeden kümzüka toktsütsü atema state sorkari tongtibang shilem agitsüla. Asen lokti nung lottery tickets/raffle draw/moudi/chiyongtsü talep/buffet tickets/calendar ayokba amala fund-raise inyakyimtem, weightments nung

AR-i Phek dist nung sentong balala ayongzüka agi

Dimapur, Luchii/December 21 (TYO): Assam Rifles-i lokti ajungkettsü atema bendanga agüja inyaka aruba nung shilem ka ama Phek District kübok Laluri yimtsüng nung comprehensive medical camp ka ayongzüka katsüogo.

Iba camp nung yimdaklir 121-i shilem agi, kong tebur 65, tetsür 32 aser tanur 24 densema liasü. Parnok nem medical team-i teyari balala agüja liasü.

Iba medical camp ya yimdaklirtem nungdak peritsütsü nukjidong nung ayongzüko, shirnok kinük nung aliba ajanga aiben medical facilities tem magiteti arudar.

Tekümzüka agütsütsü asoshi dang masü saka parnoki tenzüka lokti, health aser terenlok asoshi Assam Rifles bendanga agütsür lir.

Medical camp tajung ayongzüka katsüba atema yimtsüng nung alirtemi AR dang kanga pelaba lemsatepogo aser iba ajanga

parnok taküm dak kongshiba indang lemsatepa liasü.

Kasa mapang nung Assam Rifles-i, Phek jila nung Assam Rifles Public School (ARPS) nung kaketshirtem, tesayurtem aser tsürapurtem den Christmas benjung sentong ka ayongzüka agiogo.

Iba sentong ya December 20 nü agi aser iba ajanga tanurtem, tsayurtem aser tsürapurtem ajak longjemdakja pelatepa mungogo. Iba Christmas sentong ya benjungteptsüba atema dang masü saka Assam Rifles aser tangartem tsüngda tesendaktep akangshitsü nukjidong nung ayongzüka agiogo.

Iba sentong nung tanurtem nem sempet aser nanglong lemja liasü. Kangadang jung apiteta sentong tajung ayongzüka katsüba atema tsürapur aser tesayurtemi kanga pelaba lemsatepogo aser iba ajanga tanurtem dak koda kongshi iba indang lemsatepa liasü.

Combined Annual Training Camp tembangogo

Dimapur, Luchii/December 21 (TYO): 1 Nagaland NCC Girls Battalion, Kohima-i ayongzüka agiba NCC Combined Annual Training Camp (CATC-102) December 20 nü Greenwood School, Dimapur nung takok ngua tembangogo.

Camp nung Nagaland kübok züngoksema aliba school tem nungi senior aser junior divisions cadet 550 dak temai shilem agia liasü. Anogo 10 camp agiba mapang cadet tem nem military training balala agütsüba den military subject balala nung tendangogo aser tazüokba taküm kaka alitsü asoshi tangazükba agüja liasü.

Camp mapang lenla balala nung mongintem jaoka SSB Selection Procedure, New Recruitment Policy of Indian Army, Cyber Security, Health, Hygiene and Nutrition amala onüktem nung ajemdaker cadet tem nem tangazükba agütsü.

Military Equipment sayaba aser amshiyim sayuba aser Band Display ya ajaki sapuba sentongtem liasü. Camp mapang ano State Disaster Relief Force-ia Firefighting and Disaster Management lecture ka ayongzüka agi aser parnok inyakyim sayua liasü.

Cadet tem Small Arm Firing, Tent Pitching, Extempore Elocution, Drill aser curriculum dak ajemdaker tanga military subject tem nung tendanga liasü. Maneni camp mapang asaya balala ayongzüka asayaogo, kong cadet temi parnok sempet aser sportsmanship sayua liasü.

Camp nung tatemsa sobaliba sentong ka ayongzüka agi, kong cadet tem parnok indang sempet sayuba den Nagaland indang sobaliba balala sayua liasü, ta Manipur, Nagaland and Southern Arunachal Pradesh Ministry of Defence, PRO & Spokesperson-i sangdong ka ajanga metetdaksü.



December 21, 2023 nü AICC headquarters, New Delhi nung Congress Tir, Mallikarjun Kharge, Sonia Gandhi aser Ambika Soni nung 'Congress Working Committee' senden nung adendang tangokba noksa nung angur.

Lok Sabha senden tembangogo; CEC aser ECs shimba bill agizük

New Delhi, Luchii/ December 21 (Agencies): Asükwa mongpu Lok Sabha senden December 22 tembangsü liasü saka anogo ka jelia Brihostibarnü Lok Sabha senden tembangogo.

Asükwa mongpu senden nung Lok Sabha senden nung Brihostibarnüa opposition MP asem anenja liasü aser ibaji densemabo ajak senteper MP 100 anentsü.

December 13 nü Parliament nung security raksaba onük nung opposition-i Home Minister Amit Shah dang House nung telangzüba agütsüsüla, ta takhangba agüja aruogo.

Kasa takhangba agütsüdang Brihostibarnüa Lok Sabha nung Congress MP asem- Deepak Baij, Nakul Nath aser DK Suresh nung anentsü aser tan mongpu nung House anaprongla nungi opposition MP ajak senteper 146 anentsüogo, aser iba ya linük putiotsü nung Parliament mongpu ka nung MP teimtiba anentsüba lir.

2001 küm kiralongrartemi Parliament amakba sülen iba anogomong nung (December 13, 2023) nisung ana public gallery nungi Lok Sabha telungi aita timtem aüja liasü.

Lok Sabha nung Indian Penal Code (IPC), Code of Criminal Procedure (CrPC) aser Indian Evidence Act melentsü atema tongtibang bill asem agizüka liasü.

Brihostibarnü Lok Sabha nungsa chief election commissioner aser election commissioners shimba dak sendakba Bill agizük.

Iba mongpu senden nungsa House-i Ethics Committee-i benokba onük ka agizüka bangzüng ka renemba sülen TMC MP, Mahua Moitra Lok Sabha nungi jendoka liasü.

Asükwa mongpu senden ya December 4 nü tenzük aser December 22 nü tembangsü sentong liasü saka anogo ka jakedang December 21 nü tembangogo.

Lok Sabha nung opposition züngsem ishika dang lia Brihostibarnü Chief Election Commissioner (CEC) and other Election Commissioners (Appointment, Conditions of Service and Term of Office) Bill, 2023 agizükogo.

Union Law Minister, Arjun Meghwal-i iba bill benoka liasü. Iba bill nung CEC aser election commissioners shimtsü atema inyakyim, telatetbatem, qualifications, Search and Selection Committees shimtsü, office kümsük, itasen, mapa nungi anisüngzükba, agenba, sodi aser pensions indang tejangja shia lir.

Iba bill ajanga Election Commission (Conditions of Service of Election Commissioners and Transaction of Business) Act, 1991 melentsü.

Union Law Minister,

Meghwal-i, committee-i benokba nung ajemdaker Supreme Court-i linük Tiri CEC aser election commissioners shimtsü, ta metetdaksü.

CEC aser ECs shimba committee nung züngsemtemji Ato kilonser, Opposition Lenir mesüra opposition party tulutiba nungi lenir aser Chief Justice of India liasü.

Meghwal-isa, iba bill ajanga Cabinet secretary masü saka Law Minister ji search committee nung tongti asütsü melenshir, ta metetdaksü.

Selection Committee-i benokba nung ajemdaker linük Tiri CEC aser ECs-i shimtsü aser committee nung züngsemtemji Ato kilonser, Union Cabinet Minister ka aser Opposition Lenir mesüra Lok Sabha nung opposition party tulutiba nungi lenir ka asütsü.

Senden nung opposition züngsemtem aika malidang sorkari iba bill agizükba atema opposition-i sorkar aitsüogo. MP 97 anentsür aliba agi senden nung tongti opposition party temi iba bill atema o lemtepa nung shilem magi.

Opposition party temi, iba bill ya tesüiba küm 9 tsüngda democracy anema inyakba tulutibatem rongnung ka lir, ta metetdaksü.

Congress lenirtemi, iba bill agizükba ya ajanga linük election nung temelenshi alitsü aser democratic inyakyim nung kongshitsü, ta metetdaksü.

India-i minorities shinga mebandanger: PM Modi

New Delhi, December 21 (Agencies): Ato kilonser, Narendra Modi-i, India nung loktiliba nung yimsü tsütsü nütsüng kanga ajema alirtem shinga bendanga mezüngshir, ta metetdaksü.

Tawa interview ka nung pa dang, India nung Muslim minorities tarutsü tia koma asütsü? ta asüngdanga liasü.

UK nung amenoka aliba Financial Times den jembidang Ato kilonser Modi-i India nung Parsis nungertem rongsenkettzüng tsütsü takok anguba metetdaksü.

"Alima tesem kar nung reshikangshi liaka parnok (Parsis) India nungbo pelaa dang alir aser azükarur," ta Ato kilonseri metetdaksü.

Paisa, "Ibaji ajanga India nung loktiliba nung yimsü tsütsü nütsüng kanga ajema alirtem shinga bendanga mezüngshiba mali," ta ashi.

Ato kilonseri, Parsis nungertem ya India nung nütsüng kanga ajema aliba

nisungtem lir, ta ashi. US-i, Khalistani kiralongrar Gurpatwant Singh Pannun tepsettsü asalentong yangluba nung India-i shilem agia lir, ta jembiba dak sendakba nung Modi-i, kuli lir asü maliar sorkari ibaji reprangshitsü, ta metetdaksü.

Paisa, tatalokba kar ajanga India aser US na tsüngda tesendaktep meraksatsü, ta ashi.

India nung melung mesüi ola adokertem sorkari songtemer, ta tai tonglokja aliba dak sendakba nung tasüngdangba ka langzüdang Modi-i menüa, melung masürtemi media sabang balala ajanga pei temeden amshir, ta ashi.

"Anogo shia onok nem tai tongloktsütsü atema yimobilem, TV channels, social media, videos aser twitter amshir. Yamaji inyaksü atema parnok dak temeden lir. Ajisüaka ochi langzütsü atema tangartem dak- a kasa temedenji lir," ta paisa shisem.



December 21, 2023 nü Lucknow nung Bahujan Samaj Party (BSP) tongti, Mayawati-i lar kidang osangbenertem den jembidang tangokba noksa nung angur.

Kü taküm ochishia dang lia arudar; mimshitsü kecha mali: Kejriwal

New Delhi, December 21 (Agencies): Delhi excise policy ochimashi ken o nung asüngdangyatsü atema Enforcement Directorate (ED)-i AAP tongti aser Delhi Chief Minister, Arvind Kejriwal jaokba dak sendakba nung Kejriwal-i, parnoki jaokba ya ozüng alema lir aser iba ya yimtenren tsütsülen nungi inyakba lir, ta metetdaksü.

Kejriwal-i, "Tang ED-i jaokba ya tamalen jaokba ama iba ya-a ozüng alema lir. ED-i iba ya agienadoktsüla, kechiyong iba ya yimtenren tsütsülen nungi inyakba lir. Kü taküm nung ni ochishia dang lia arur aser teladak süa inyaker. Ni mimshitsüsa kecha mali," ta metetdaksü.

ED-i December 21 nü Kejriwal jaoka liasü, ajisüaka pai jelia sentong yanglua aliba ama pa mejangjaba tesem ka nung anogo 10 nü 'Vipassana meditation course' agitsü atema Bodhbarnü apusoa ao.

Ano külen Aam Aadmi Party (AAP)-i, Kejriwal-i Vipassana session agitsü

atema jelia sentong yanglua liasü aser yimjak nunga iba sentong sangdonga liasü, ajisüaka ED-i metetsümonga iba ama mapang ka nung ang pa jaok, ta metetdaksü.

Taküm November 2 nüa ED-i kasa ken o dak sendakba nung Kejriwal jaoka liasü saka ibaji ozüng alema, ta shia pai ED matsüngdangi mao.

Tamalen Delhi excise policy ochimashi ken o nung CBI-i Aam Aadmi Party lenir, Manish Sisodia pua liasü. AAP lenir aser taoba mapang Delhi Deputy Chief Minister, Manish Sisodia February 26, 2023 nü apuba sülen pa tang tashi jail nung lir.

Delhi excise policy ochimashi ken o dak sendakba nung CBI ketdangsertemi ashiba agi, AAP sorkari excise policy nung ochimashi mapa aika inyakogo, iba nungji Excise Policy yanglushiba, yi ayoktsü license atema sübokrem agiba, licence fee ajemtsüba mesüra atokba aser temelaba memeshii L-1 license atsülangtsüba densema lir.



December 21, 2023 anepdang Srinagar nung rürjep tera kümer aliba Dal awatsüng nung nisung ka rong nung aodang tangokba noksa nung angur. Jammu & Kashmir nung temekongtiba anogo 40 mongpu dang 'Chillai Kalan' ta ajar aser iba mongpu Brihostibar nungi tenzük.



TIR YIMYIM YIMOBILEM (EDITORIAL)

DIMAPUR ROGONÜ, DECEMBER (LUCHII) 22, 2023

Kharge PM asütsü na ?

Yimten yimsüsübaren 'politics' nung aiben meimlaba ataloker kechiyong nisungi sentong yanglur saka ataloktsübajibo Tsüngrem mulung lir. Aji oda, yimten mapa nungbo teti asoshi tembar mali aser tsükchir-a mali, tanü külem asütsü saka asüngbo telok balala nung alitsüa akok ta tsürabur mapang nungi jembia aru aser aji shitak lir. Iba kasaji taruba küm linük nung Lok sabha election agiba sülen government akümba mapang nung ataloktsüa akok. Tangbo nisung aikati sangküma anosa BJP teloki yimsü asütsü aser Narendra Modisa ato kilonser (Prime minister) asütsü amai bilemer. Aji tebilemla bilemer, kechiyong tang tatar hoho nung BJP züngsem kanga agia teimba mena aliba züngsemtemji khen yutsür, tawa state pezü nung assembly election agiba nung BJP teloki state asem nung akokba nungji temulung alemtsü tulu lir. Iba takok yaa aika asoshi meimlaba takok ka liasü aser ano shingaia meimlaba ka BJP teloki inyakba kaji, item state shia nung Chief minister asütsü atema taintem rongnung raktepa lia, khenyongi meimlaba tatar kin tila aser tanuburtem rongnungiang shimteta chief minister kümdaktsüba ya asütsü. Iba mesükji tang opposition teloktemi akümba INDIA telongjemia inyaktsü amai sayudagi. Aji oda, joko Lok sabha election agitsü mapang nenjunga arur asünungji, INDIA telongjemi taruba Lok sabha election nung tatar menden teimba nguteta takok angu nunga shiba ato kilonser, Prime minister' kümdaktsütsü ta asübaji tebilemla tulu saka aser teinyaktsü tongtibang ka kümogo. Atangji, opposition telongjem INDIA telok nung alirtem rongnung ato kilongser asütsübaji shiba shimer, shiba meshim ta nübo tajung aser tetemsü aika lir. Ajisüaka, INDIA telongjem asoshi Congress teloki Nehru'er semchirtem dak dang rangloker, kechiyong yamajika mesüra Congress tashimaitba akümtsü amai bilemer südir. Ajisüaka, BJP asoshi opposition aser Congress anema raratsüba onük tajungtibaji Congress teloki Nehru'er kibong nungi dang par senmang küma ato kilonser sūdakja aruba anema jembiba ya lir. Ibaji angateta, tang TMC tongti lenir aser West Bengal Chief minister, Mamata Banerjee aser Delhi Chief minister Arvind Kejriwal nati par opposition telongjem INDIA telok dang Congress tir Mallikarjun Kharge ya taruba election mapang INDIA teloki kokra ato kilonser sūdaktsütsü atema sangdongdi ta tebilemla ka par telok senden nung süokba ken o nungji meimla ataloktsü koka lir ta sayur. Atangji, Mamata aser Kejriwal na prongla ya linük nung chief minister-tem rongnung nungtugu aser tajungtem lir, anungji parnok ashiba o nungji tebilemdangtsü aser tagitsü keta lir. Tenati parnok INDIA senden nung benokba ken o nungji Congress nem angatetdaktünüba onüka tongtibang ka lir, aji opposition telok telongjem INDIA nungi ato kilonser asütsübaji Nehru aser Gandhi nungi jakzükbata nisungi masü saka tangar ka asütsüla ta ashir ta angatetsüla. Tetezü Sonia, Rahul Gandhi aser Priyanka Gandhi nungertemi ato kilonser asütsü memerangtsüla ta shinerba alitsü. Iba tebilembaji majungbo masü, kechiyong INDIA telongjem nungi prime minister asütsüba nisungjibo Congress nungi asütsüla ta aikati bilemer saka tang tangbo Nehru Gandhi nungi jakzükbatem dak BJP sentsü koka tongpang nung nokdaktetsüba nisung mali amai kümogo. Ibaji Nehru dak nungi jakzükertemi metetsü tim aser parnokiang Kejriwal aser Mamata na dang tama taruba ato kilonser atema tokteptsüba nisung tenungji shiadoktsüla. Atangji, ato kilonser asütsübaji election nung tatar menden teimba agitet nung dang shimtetsü, ajisüaka election nung takok angutsübaji par mesüra asen telok nungi 'Prime minister' asütsü atema shiba shimtsü ta asüba dak tulu keta lir. Linük nung shingaia P.V.Narasimha Rao aser Manmohan Singh na ato kilonser akümtsü meibilem, saka tenatiang 'Liberalisation aser globalization' sentong tasen bener arua linük kümzük. Iba amaji Nehru aser Gandhi kibong nungi masü saka Kharge ama ka dang taruba government nungbo ato kilonser asütsüa akok.

OLEMSABANG

Asenok koda lia aru ? Aji khen meyipa repringshidi

~ L.Kika Pongener.

2023 küm tembanga arudagi aser ano anogo ishika tsüngda nung küm tasen ka ajurutsü. Taküm küm mezüng January anepdang, Tsüngrem dang iba Kibubar küm 2023 asoshi wadang tasen meshia, Tsüngrem den tezüngzüktepba tasen yanglua, tenzüker jajayonga/liyunga aruba, jokorla anogo ishika tsüngda nung küm tembangtsü. Anogo noklang asem sur roker pungoji anogo ka amai dang tembanga arudagi. Anungji 2023 küm asen kija taküm, kibong, yimden, arogo aser asenok sentaktepa aliba loktiliba ajak nung...Koda lia aru...??? Tsüngrem mulong achitsüsa lia aru asü...??? Mesura Tsüngremi mulong machitsüsa lia aru...??? Aji meyipa repringshidi.

Asen kija taküm Tsüngrem dang azüngashia nangzükbata ama lia aruogo ma...??? Aji oda, Tsüngremi anema toktsüba atema tenungsang agüja, anema alidangpo Tsüngrem külemtsü jangrapangra-a sentepi meranga ogo ma...??? Tsüngremi asen nem moatsüba temoatsü züngdanga, pa nem tenungsang agüja, tershilem tenla, tepela/temoatsü tenla ochishia aser meranga agütsüogo ma...??? Küm piyong lia arudang, Tsüngrem tsüngdang sentsüh masütsüsa aser tesulen mesasatsüsa, shir dang tajung inyaktsüla...aji shitak inyaka aruogo ma...??? Asen den külemi lisemer, kiyong-kidanger aser lokti nung külemi tenzüker den jungtepa, meimtepa, pelatepa lia aruogo ma...??? Tsüngrem oi ashir, "Ne keti inyaktsü tashi alidang shir dang tajung inyaktsü tsüa ali, parnok dang nungi sota teyu" (A.Shin-3:27). Anungji Tsüngrem tsüngdang sentsüh masütsüsa aser suir külen mesasatsüsa, tamakok kar danga lira...khen meyipa repringshidi.

Asen kibonga Tsüngrem dang azüngashia nangzükbata ama shitak lia aruogo ma...??? Apuani tsüngda kati ka akümtsüba, kati ka züngshia, kati ka den meimtepa lia aruogo ma...??? Asen jala-jabasotem den tesendaktep tajung nung lia aruogo ma...??? Tesasatsüka, tanü kibongtem aika, apuani tsüngda temeim mekongka kümer, pei pei dang litepba kibong aika lir. Kibong karbo kinungpu kechi inyaker kinungtsüi memetet...Kinungtsü kolen jajar kinungpui memetet, kati ka hau...ta mali litepba kibongtem lir. Kibong karbo tsürabur o chirnur tsüngda nung tesendaktep tajung mali, tsükchir amai kümadoker aliba kibongtem lir. Tesasatsüka, jabaso-i tebu den indang-indanga mejembitet tetsü ajanga tongteprateper, jala-i tetsü den indang-indanga mejembitet tebu ajanga tongtepratepba kibong karbo lir. Kibong aika kibong memesuk, saka 'Hotel' dang mesuka, pei pei mapang nung, arua chiyungli oadokli...ta asüba kibong lir. Anungji akok tashi kibong nung alir ajak külemi medema chiyungtsü merangtsüla aser chiyunger külen, kibong tekülem agitsüla, aser tsüraburi chirnur dang sayu-bentsü o ashitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogo kati Khristmas mapang kibong aika nem teyari agütsü



Savannah, Georgia nung aliba Kingdom Life Christian Fellowship-i nungdakba kibongtem nem teyari oset balala lema agütsü tangokba noksa nung angur.

Luchii/December 20, 2023: Khristmas atongtsü mapang anasa Savannah, Georgia nung aliba Kingdom Life Christian Fellowship-i teyari nungdakba kibong noklang aika nem chiyungtsü box 1,200 den gift cards agütsü.

Kingdom Life Christian Fellowship ya Savannah nung aliba non-denominational Arogo ka lir aser parnokki taküm agi küm pezübuba Khristmas mapang "Blessings on the Southside" sentong ya ayongzüka agir. Taküm parnokki teyari nungdakbapur nisung 1,677 nem teyari agütsü.

Osangbener den jembidang Pastor Charles P. Roberson-i, Arogoi 2020 küm Coronavirus wara mapang nung timtemer kibongtem yaritsü atema iba sentong ya tenzüka liasü aser taküm ayongzüka sentong nungsa sempet teimba agütsüogo, ta metetdaksü.

"Onoki mezüing arur kibongtem nem tama teyari agütsü; kibong karbo anepdang

4:30 ako nunga arua liasü," ta pastor Roberson-i metetdaksü.

Iba sentong ya Honibarnü (December 16) nü agia liasü.

"Tia kaa onoki teyari nungdaka arur ajak nem teyari agütsütetogo. Gari 736 nung chiyungtsü box 1,200, sempet 1,528 aser gift cards bener arua agütsü," ta pai ashi.

Arogo aser Arogo indang partner Forsyth Farmers Market-i kibong shia nem aonsotsü agütsü aser tanurtem nem sempet lema agütsüba den külemi Arogoi item kibongtem atema sarasademtsüogo.

Roberson-i, "Iba sentong nung nisung aikati Khrista agizüka liasü. Asenok ya Khristar teka aser tetsüngtem lir, anungji iba ya Pa mapa lir," ta ashi.

"Tsüngremi parnok meimer ta kibongtemi tamang akatsü onoki imlar. Tanabuba nung teyari agütsüba mapa inyaktertem dak parnokki Khrista tesangwa angütsü, ta amanger," ta pai ashi.

"Tatensa item kbongtemi pei

dang nungibo tangar atema inyaksübaji tongtibang ta tatishitsü angazüker alitsü, ta onoki amanger," ta paisa shisem.

Khristmas mongpu nung United States tesem ajaklen Arogotemi sensaker kibongtem atema charity sentong balala ayongzüka katsür.

Tan ita tetenzüklen Sacramento, California nung Assemblies of God den affiliate süa aliba Destiny Christian Church-ia Khristmas nungtem nung sensaker kibongtem nungi tanur 2,000 dak tema nem sempet agüja liasü. "Love Our City Christmas" sentong nungji Arogoi tanurtem nem kazütsü oset balala, süoshi, jacket, tsüngsem aser kaket lema agüja liasü.

West Orange, New Jersey nung aliba Life Christian Church-ia sensaker kibongtem nem dollar sen 30,000 jenjang chiyungtsü agütsü aser North Carolina nung aliba Lawndale Baptist Church-ia sensaker kibong 1,000 chiyungdakja liasü.

Uttar Pradesh nung Khristan putir ka den Khristan 3 jail nungi chiok

December 21, 2023: India kübok Uttar Pradesh nung aliba court kati Khristan putir ka den Khristan asem bail nung chiokogo.

Uttar Pradesh State nung anti-conversion özüng kübok par pezü nem tai tonglokja apuba sülen tesüiba ita asem tashi parnok jail nung liasü.

Khristan putir, Babu Francis ya Allahabad diocese nung Social Work Director inyaker.

December 18, 2023 nü Allahabad High Court-i parnok pezüprongla nem bail agütsü.

Allahabad nung Bishop, Louis Mascarenhas-i sangdong ka ajanga, "Putir Babu Francis den Khristan asem nem bail agütsüogo. Kobi melii parnok tepuokdak nungi chioktsü," ta metetdaksü.

Louis-isa, par pezü chiokba ya Khristmas sempet ka

mesük, ta ashi.

"Parnok timtembaji amajokbosa masütsü. Iba ya ajanga Kibuba tenzüksü atema Arogo tashi itshitsü," ta paisa metetdaksü.

December 21, 2023 nü osangbener den jembidang Allahabad diocese nung chancellor, Isidore D'Souza-i, "Onoki mapang talangka ken o jembia aruba sülen tatensa bail nguogo," ta ashi.

Uttar Pradesh Prohibition of Unlawful Conversion of Religion Act kübok aibelenertem küm 10 tashi tepuokdak ayutsü aser senchi-a achitsü akok.

D'Souza-isa, bail temepishiba ken o angadangtsü atema local court kati ponguben tashi atsülanga liasü aser tesüsa bail magizük, iba sülen high court nung bail

temepishiba ken o asemenbuba angadanga mapang nung ang parnok nem bail agütsü, ta metetdaksü.

BJP lenir, Vibhavnath Bharati-i police dang, putir Babu den tangar Khristanatemi yimdaklirtem Khristan yimsü dangi meyipdaksütsü meranger, ta tai tonglokja liasü.

Paisa, Khristantem jagi Hindu nungter tsüngremtem tenüing menüksür, ta tai tonglokja liasü. Iba sülen October 1 nü police-i par pezü pua liasü.

Taküm küm tenzüker November ita tashi nung Uttar Pradesh nung Khristantem anema inyakba tatalokba 287 lir. Kasa mapang nung linük nung Khristantem anema inyakba tatalokba ajak senteper ken o 687 liasü.

ANOGO ABEN TSÜNGREM DEN

Arogo nung pa dang sentsüwangshi süang

Efesa 3:14-21

Anungji mepet tulu ama kuli aika agi asenok meketbang.... Ibri 12:1.

Chiyongtsü aser aben süoshi, ki aser alinük, yimjung aser anema aliba asoshi tenüing asangtsü talang ka magütsü.

Tsüngrem sempettem asoshi tongtipang tenüingsangji Tsüngremi Pa taküm asenok nem agütsüba asoshi Pa tenüing asangtsüla: Pa Tanela asenok dak alir, teti taküm lidaktsür; asenok tasü masü taküm kadaktsütsü asoshi Pa jabaso asü aser shia aru; Pa osangtajung kechi ajanga Pai asenok nem taküm tasen agütsü; Pa arogo, asenok Khristan tembartem, kar kotak nung, kar alima nung, shirnoki iba osangtajung aser iba tamang asenokden lemsateper.

Iba ama mepet tulu ama kulitem agi asenok meketbanga lir: Khristan tsüburtem, shirnoki iba Khristan jajaba nung tenzükdaktsü, kinüngtsü, kinüngbu shiba tatishitsü taküm aliba osangtajung ka aküm; Khristan tanurtem, shirnoki Khrista temeim ajizük; Khristan tembartem, parnok Khrista mesük jakla ajanga Khristai asenok den jembir; pastor shiba ajanga asenok dang Tsüngrem O ain nung koda jembitsü asenok dang sayur.

Yamala mepet tulu ama kulitem agi asenok meketbanga lir. Sentsüwangshi tenyartem telok, ainkartem telungjem tamaren tamang asoshi tepseter telok alima ajunga nung temeshi arogo! Onok jajaba lenmang Khristan lenmang asoshi onoki Ne tenüing asanger, Kibur Yisu. Amen.

Nüngtugu wrestler, Hulk Hogan aser pa kinüngtsü na baptiogo



Hulk Hogan baptidang tangokba noksa nung angur.

December 21, 2023: WWE nung kanga nüngtugu wrestler tem rongnung ka, Hulk Hogan arrshi küm 70 nung pa kinüngtsü den külemi tzü nung baptiogo.

Hulk Hogan indang chichiba tenüingbo Terry Gene Bollea lir.

Bodhbarnü pai social media ajanga Florida nung aliba Indian Rocks Baptist Church nung pa baptiba noksa lemsatepa liasü.

"Yisu nem kü ajak bendanga agütsüba anogo ya kü taküm nung anogo tajungtiba lir. Shisabulu mali, tesempa mali, obendang mali....temeim dang," ta pai Instragam ajanga lemsateper.

Kasa sentong nungji pa kinüngtsü, Sky Daily Hogan-a

bapti. Hulk Hogan-i pai wrestling asayadang teti tekolak nung mesüba ama 'bandana' sü ka mesüa liasü saka tanbo pai bandana ji temesüing ka mesü.

Indian Rocks Baptist Church-ia Instagram ajanga, "Tsüngremi Indian Rocks nung sayatonya mapa inyakdar," ta lemsateper.

Hulk Hogan-i taküm April ita nung mezüing pa yimsü indang lemsatepa liasü.

April ita nung pai X ajanga, "Ni arrshi küm 14 asüba mapang nung ni Khristaji kü Kümtetdakba ta agizüka liasü. Training agiba, sarasademba aser vitamins achiba ajanga ni asayateta liasü saka tangbo ni Tsüngrem den ka kümogo," ta lemsatepa liasü.

AO OSHI ANGAZÜKDAK:
TANÜ ANGAZÜKTSÜBA OJANG



Shilujungtep

(v) tanaben putepshiba, yaritepba (revive friendship)

* Onok kin ana tsungda shilujungtep tenzükogo.

Shim

(v) balaka agitetba, tajung-tamajung bendanga agitetba (pick, choose)

* Tetsürtemi anogo piyong jang shim.

OLONG PAITEP # 6651

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPLÉN

- 2. Teburtemi tejak nung awaba
- 6. T _ _ _ em
- 8. Tzük ayudak
- 9. Nungdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsungda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6649 TELANGZÜBA

TIPLÉN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kioktsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.

NAI-A YA METETTER MA

ALIMA NUNG MILITARY TASHI TAITTIBA LINÜK 10

Country	Power Index (PwrIndx)
1. United States	0.0712
2. Russia	0.0714
3. China	0.0722
4. India	0.1025
5. United Kingdom	0.1435
6. South Korea	0.1505
7. Pakistan	0.1694
8. Japan	0.1711
9. France	0.1848
10. Italy	0.1973

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Assam nung sen crore 4.5 alang Channa Barca ango 500 puogo



Assam nung Channa Barca ango apuba noksa nung angur

Dibrugarh, Luchii/December 21 (Agencies): Dibrugarh Forest Department-i Brehostibarnü Dibrugarh Airport meita aoba mapang Channa Barca ango 500 puogo.

Iba ango ya kangabo bulua manguba ango ka lir aser international market nung sen crore 4.5 alang liasü.

X sabang ajanga Assam chief minister Himanta Biswa Sarma-i, "@assamforest-i anti-

smuggling operation ka benoka inyakba mapang Dibrugarh Airport nung Channa Barca ango 500 puogo. Iba ango ya kanga bulua manguba anogo ka lir aser international market nung sen crore 4.5 alang liasü. Channa Barca ya kanga bulua manguba snakehead species ka lir. Iba ango ya

Brahmaputra ayong tzükümlen aser Bangladesh nung angur. 2014 küm iba ango ya Bangladesh nung sama aotsü ana nung lir ta IUCN-i asateta liasü.

Ken o dak sendakba nung Dibrugarh Forest Department-i nisung an tashi puogo.

"Iba ango ya tayimtsü ajanga Kolkata-i shibelener oya liasü. Meita aoba mapang Channa Barca ango ya Dibrugarh Airport nung pua liasü. Onoki shibelener dak sendakba nung nisung ana puogo. Onoki iba nisung ana dang ken o asungdang tenzükogo," ta forest ktdangsur kati ashi.

Paisa, "onoki Brehostibarnü Dibrugarh Airport nung ango kar puogo. Onoki ango ya asadangtsü atema Laboratory-i yokogo," ta ashi.

Source ajanga ashiba agi, shishilembadak takhangba kanga aliba ajanga iba ango ya shibelener.

Assam DGP-i dist ajak nungi police ktdangsurtem den ajurutep

Guwahati, Luchii/December 21 (Agencies): Assam director general of police (DGP) GP Singh-i Brehostibarnü (December 21), state kübok district ajak nungi police ktdangsur tejentem den ajurutepogo.

Iba senden ya Guwahati kübok Ulubari tesem nung Assam police headquarters nung agia liasü.

Osang ajanga ashiba agi, Assam DGP-i state kübok district ajak nungi assistant superintendent of police (ASP) den ajurutepogo.

ULFA-I puri grenade pokloktsüba mapang ka nung district ajak nung security akangshitsüba dak rangloker iba



DGP GP Singh

security dena akangshiogo.

Tawa Paresh Baruah-i ULFA-I puri Tinsukia, Jorhat aser Sivasagar district tem nung army camp tem anasa bomb pokdakja liasü.

Assam anütoklen Jorhat, Tinsukia, Sivasagar, Dibrugarh aser Charaideo district tem nung ULFA-I pur kanga tashi ita lir.

Security akangshiogo aser security forces temi Assam-Arunachal Pradesh arrtsü kanga junga meita atadar.

Maneni ULFA-I puri amokmerenba sülen Guwahati nung Assam police headquarters aser DGP GP Singh indang official residence nunga security akangshitsüogo.

Tripura nung sen crore 40 alang heroin apu



Agartala, Luchii/December 21 (Agencies): Tripura Police-i North Tripura kübok Churaibari District nung Bodhbar aonung menor Assam nungi nisung kati sen lakh 40 alang heroin bener lia puogo.

North Tripura District, Superintendent of Police Bhanupada Chakraborty-i osangbenertem dang ashiba agi, osang tejangja ka angazükba sülen Kadamtala Police Station

Officer-in-Charge Shibu Ranjan Dey-i achaayanga jenjang agiba mapang Assam nung Karimganj kübok Patharkandi nung alir Rashid Ahmed (19) puogo.

"Ken o ashishiba sülen onoki heroin gram, 473 apu. Pa nem teyari agütsür kar densema liasü saka parnok jena oatok. Temesepba mozü ya sen lakh 40 shi asütsü," ta Chakraborty-ashi.

Police-i, heroin gram 473 ya talep trok nung seper tsungsem box ka nung bener lia nguteta liasü.

"Aija alisang yagi police dang heroin ya Agartala-i bener aotsü atema Patharkandi nungi bener arua liasü ta ashi," ta paisa shisem.

Temesepba mozü ya kechi nung bener aru aji jangjatsü atema bushisungdang tenzükogo.

UNSC nung Gaza yimjung asoshi vote magiteter

New York, Luchii/December 21 (Agencies): Israel-Palestine rara anena atatsü aser Gaza Strip nung teyari agütsütsü asoshi United Nations Security Council nung vote magiteter, kechiaser pangzüng züluyim nung tangatetep kati maruteter, aser Israel-i Gaza south tsütsü alirtem dang ainshitsü totuyuba agütsüto.

Gaza nung kanga nungdaka aliba mozü, chiyongtsü, tzü aser osettsüset tem agütsütsü asoshi United States-i ano tenokdangba magütsütsü mechi UNSC züngsemtem kanga kumdanga jembishinü akar.

Israel-i Hamas den raraba mapang nisung 20,000 dak tema süogo ta Palestine ketdangsur temi ashir.

Iba vote ya asemen tashi menudaktsü, aser Brehostibarnü agiteptsü imlar, ta Ecuador indang UN Ambassador aser tang UNSC tir Jose Javier De la Gasca Lopez-Dominguez-i ashi.

"Gaza-i humanitarian aid yoktsü asoshi UN Security Council nung asemnü tsüngta vote tenetben menu mesüra thinenogo," ta New York nung aliba UN headquarters nungi osangbener kati Bodhbarnü ashi.

"Parnok asoshi tongtipangba onükji 'monitoring mechanism' mapa kuma amshir aliba atema lir. Gaza-i teyari osettsüset aiba aser nüburtem nem lema agütsüba nung United Nations-i dang achayangtsü," ta osangbeneri ashi.

Tangbo Gaza-i teyari oset yokba aser lema agütsüba ajak Israel-i achayanger, saka draft

tasenba nung UN kisüngi reprangtsü asoshi mechanism ka amenoktsü atema lir. "Gaza nung amshitettsüsa aser terenlok alitsüsa pangzüng ka ajaki aginer," ta United Arab Emirates nungi UN ambassador, Lana Zaki Nusseibeh-i ashi. Bodhbarnü tashi atsülangtsü council ajanga mulungtepba sülen iba pangzüng ya parnok sponsor asü.

Israel indang rara nung teti asoshi tsükchitep anentsü shia aliba ojang US-i melenshitsuütsü meranger.

Gaza nung tsükchitep anena atatsü ayongzükba pangzüng ya UNSC nung agizüktsü teimla lir ta Nusseibeh-i ashi.

"Ni teimla lir, aser tamakok ajurura asenoki maneni merangtsü, kechiaser asenoki merangtsüla. Council nung yamai tanen makai tamakok nung alitsüla masü timtem lir... asenok pangzüng ka lir aser asenoki yangji amendaktsüla," ta lai osangbener dang ashi.

UNSC vote ya mezüng Hombarnü thinena Mongulbari aben aser ano Bodhbarnü aben.

Hombarnü benokba draft text nung "tangsa aser teti asoshi tsükchitep anena atatsü" ta shia lir, saka iba ojang yangi US memesüzüktet.

Bodhbarnü yangluba nung "timtem aser tetsükdaksü majurui teyari agütsütsü asoshi tangsa tsükchitep anena atatsü aser teti asoshi tsükchitep anena atatsü asoshi tekeraba nung mera agitsü" ta shia lir.

US National Security Council odongtar John Kirby-ia Bodhbarnü onük ana benok

ta ashir, koba draft nungbo mali aser ibaji Hamas-i October 7 nü Israel telungi aitba aser pei sasa pei kumzüka ayutsü Israel temeden liasü.

Gaza nung tangsa humanitarian ceasefire alitsü khanga UNSC pangzüng ka benokba December 8 nü Washington-i agientsü. Züngsem 193 aliba UN General Assembly ajanga December 12 nung iba pangzüng mesük saka talenba maka agizüka liasü.

Diplomats temi pangzüng renemtsü asoshi atsütepba mapang UN Office for the Coordination of Humanitarian Affairs (UN OCHA) ajanga ashiba agi, Israel mitkar temi central aser southern Khan Younis yimti shilem 20 shi nungi nüburtem tangsa ainshitsü Bodhbarnü totuyuba agütsü.

"Iba totuyuba yangi nisung aika dak kongshitsü aser parnok tesem balala nung prokshitsü," ta Khan Younis nungi osangbener kati ashi.

Israel-i amak metenzükdang iba tesem nungya nisung 111,000 dak tema liasü aser tangbo shelter housing 32 densema nisung 141,000 dak tema rara ajanga northern Gaza nungi jenshiogo.

Israel-i mezüngbo civilian tem dang pei kimzüktsü asoshi Gaza north tsütsü nungi south leni aotsü shia liasü.

October 7 nü tenzükba rara nungya Gaza nung nisung 20,000 shi tepsetogo aser yangji tila tanur 8,000 aser tetsür 6,200 dena lir, ta Palestine ketdangsur temi Bodhbarnü ashi.

Bendang lima nung aliba Ukraine senso tebur ajak army nung züngoktsü ashi

Kyiv, Luchii/December 21 (Agencies): Ukraine nung tebur arishi küm 25 aser 60 tsüngta bendang lima nung alir ajak military service asoshi arutsü imlar, ta Defence Minister Rustem Umerov-i ashi.

Pai ibai "invitation" ka dang lir ta ashi saka iba sülen manidaker nem temerenshi agütsütsü amai lir.

Tir Zelensky-i Mongulbarnü osangbener dang ashiba agi, sepai tasen 450,000 nungi 500,000 tsüngta nungdaker saka aji ngutettsü tasak.

Tawa Ukraine-i meyiper Russia sepaitem den raraba nung tamakok ajuru amai bilemba mapang nung iba osang ya arur.

Teyari lenmang nunga Kyiv ya timtem ajurua lir, kechiaser US Republican temi sen \$61bn (€55bn; £48bn) military package nokdang aser EU-ia

senotsü teyari €50bn (\$55bn; £43bn) agütsütsü aliba Hungary-i nokdang.

Russia-i tashi ajak amshia rara tenzükba sülen Ukraine nung tebur arishi küm 18-64 tsüngta 768,000 shi linük yutsür EU nung oa lir ta EU statistic agency Eurostat ajanga November ita shia liasü.

Yangji EU nung masü danga linüktem nung alirtem maden mesüra February 2022 masü dang nungi bendang lima nung oa alirtem maden.

Die Welt, Bild and Politico media outlets den sensaksemba mapang Umerov-i iba recruitment dribve ya temerenshi masü saka konang ka lir ta ashi.

"Parnok par sasa marura kechi asütsü aji onoki tang tejembidak lir," ta pai ashi.

Ukraine dak alaka danga linüktem nung recruitment centres mali aser parnok

tashiyim amshia arudaktsütsü Ukraine ketdangsur dak tashi mali.

Sepai nung aniokertem koma training agütsütsü, kodang aser kong tenzüktsü aser kodang chioktsü, itemi metetdaksütsü tongtipang, ta defence minister-i ashi.

Mongulbarnü Zelensky-i küm tatem osangbener senden nung jembidang tongpang nung Ukraine sepai 500,000 lir ta ashi.

Tongpang nung melentepa nokdakba aser sodi agütsüba nung temtem lir ta pai ashi.

Tang aliba sepaitem aser volunteers tem ya rara matem tashi tenzüktsü aser küm nung anogo ter dang leave agütsür.

Külen Russia Tir Vladimir Putin-i hopta tetenzüklen ashiba agi, Ukraine nung "special military operation" nung Russian sepai 617,000-i shilem agir.

**Office of the
LONGMISA SENSO MUNG DANG**
P.O. Mokokchung - 798601, B.P.O. Longmisa
Mokokchung : Nagaland

TENÜNGSANG AGÜTSÜR

Mr. Imkumtemsu Jamir aser Mrs. Rangneu Hegui tena jabaso Mr. Imtichiba Jamir. Directorate of Industries and Commerce department. Government of Nagaland nung Inspector of Industries post nungi post of Assistant Director Promotion anguba asoshi LSM ajanga konang nüngsang aser tetushi agütsür.

Tulusang Tsüngremi anema aliba arishi talang aser nü wadang ajak nung moajangma.

**Sd/-
Yashiramok Ao
President**

**Sd/-
Watitosh
General Secretary**

"TSÜNGREM AMSÜH WALOK"

Tsürapor Lt. Kümsangjungba aser Lt. Medemchila (Ungma) tena mezüng semchir ana Arogo palala nung Tsüngrem tenzükka lia bipi Arogoi temulong achibayong Tsüngrem tenzükba mapa nung tali bendanga tenzüktsü atema ano meshitetba Sentong (Ordained) anügo 19th November 2023 nung ABAM kübok Tuensang Town Ao Baptist Arogo nung. Pastor Moatushi Longkümer, Imtimeren Longkümer aser Lt. Songsongrenla Jamir tena jabaso tanubosang aser Associate Pastor Temjennaro Pongen, Merenkaba Pongen aser Süpongsangla Longkümsür tena jala tanüsüla, Old Cambridge Baptist Church Massachusetts (USA), TABCOM Kübok 17th December 2023, anügotem nung Mungdang ana kübok Arogo ana nung tenzükkeritemi Tsüngrem mapa tapensaba nung inyaktsü daküm bendanga agütsüba sentong tulu akia tetushi tulu agütsübayong ozü kinüngertemi nür Arogo-tem dang Kanga pelar. Tsüngrem-i Pa imli asoshi nenok Arogo-tem timishiba nung ajungküta amshiangma ta iba Osang kaküt ajanga sarasademma moatsür. Amen

Kinunger tenüng nung,
**K. Lima Longkümer
Chümoukedima.**

North Korea lenir Kim Jong Un-i nuclear amshitsü amokmeren

Seoul, Luchii/December 21 (Agencies): Rara mesüra tsükchir dak menungnangi nuclear amshia amaktsü policy ka lir, ta North Korea lenir Kim Jong Un-i Brehostibarnü ashi.

Tawa intercontinental ballistic missile (ICBM) tendangba asoshi pai mitkar indang missile bureau den ajurutepdang iba o ya jembiba, ta KCNA news agency ajanga ashi.

"Party indang 'battle order' den apet tang tesüsa company ajanga mitkar mapa inyakba ya DPRK indang armed forces ajanga linük kumzüka ayuba tashi-temeden nung tashi ita nokdakba sayuba lir aser 'offensive counteraction mode' tejangja rasaa ashiba aser tsükchiri nuker amshia rara mesü dang DPRK-i atsüanema melie nuclear amshia amaktsü tesayuba lir ta pai (Kim) ashi," ta KCNA ajanga ashi.

Mongulbarnü North Korea-i ICBM tasenba tan hopta tendangogo ta ashi aser ibai US-i tsükchi atentsü mapa inyakba anema nuclear force renema aliba sayuba lir ta shia liasü, koba United states aser par tembar linüktemi aija liasü.

Hombarnü tendangba ya ajanga mitkar tashi sayur ta North Korea leniri ashi aser ano maneni tali tashi itshitsü ayongzük, ta KCNA ajanga ashi.

ICBM tendangba mechi United Nations Security Council (UNSC) senden amenba atema Kim tenu tetsürla Kim Yo Jong-ia sangdong ka nung aitsü aser ibai linük 'self-defence' asoshi

inyakba lir ta ashi.

"US aser par 'satellite countries' temi akhangba ama UNSC senden amenba aser DPKR temeden indang jembiba ya khenyongi jangratemtsü maket aser aitsür," ta lai ashi.

"US aser ROK maparen aser yimya asoshi UNSC-i khuret abentsüla, kechiaser parnok mitkar tsütsü rara mesüra Korean peninsula nung tensa tamajungba kumdakja arur," ta lai ashi.

Taoba küm nungi nuclear doctrine amshi tenzükba sülen Kim-i nuclear nok-nü amshitsü amokmerena arur. Ajisüaka bendanger mongin aikati North Korea ya tang tashi 'functioning nuclear missiles' mali aser par indang nuclear ya mezüng mamshitsü, kechiaser par dang US timba lir ta ashir.

Hombarnü North Korea-i ita pungo tsüngta intercontinental ballistic missile mezüngbuba tendanga iba drill ya US aser South Korea ajanga rara mesüa inyakshangshiba anema lir ta shia liasü.

Taoba küm North Korea-i ozüng ka yanglua tensa balala nung nuclear nok-nü amshitsü renema liasü. 2022 küm tenzükba sülen North Korea-i ballistic missile 100 shi tendangogo aser Hombarnü Hwasong-18 tendangba ya taküm nuclear nok-nü tendangba tasembuba liasü.

North Korea-i nuclear nok-nü amshitsü merangra Kim Jong Un sorkar tembangtsütsü ta US aser South Korea nati tekumdangtsü shia arur.



Nagaland tetsür team-i tawa tembangba Under 14 boys aser girls 67th National School Games nung Bronze medal (Girls Regu Event) ka nguogo.

Tom Curran nem asaya 4 atema tenokdangba agütsü

Luchii/December 21, 2023 (Agencies): England nunger fast-bowling all-rounder, Tom Curran nem tang asaya aliba Big Bash League (BBL) nung asaya pezü atema tenokdangba agütsüogo. Sydney Sixers' pur Hobart Hurricanes den masaya tsungda umpire ka densema tatalokba ka dak sendakba nung pa nem tenokdangba agütsüogo.

Cricket Australia-i Code of Conduct kübok Level 3 offense ka atema Curran aija liasü.

Umpire-i pitch nung tesem ka nung masemtsü atema

tetuyuba agütsüba sülena Curran-i asema sülen iba ya ataloka liasü. Umpire-i Curran dang pitch nungi atsüingintsü atema teyu saka Curran-i umpire tsütsüleni kanga kara asema ao, shiba metsükteptsü atema ainshia liasü.

Iba sülen Match Referee yagi Code of Conduct kübok Article 2.17 dak ajemdaker umpire amokmerentsü merangba atema Curran aija liasü.

Asaya tembangba sülen Match Referee-i, Curran nem suspension points pezü agütsü, koba BBL nung asaya 4 atema

tenokdangba agütsüba den saku.

Iba obendang agütsüba dak sendakba nung Sydney Sixers-i parnok temlung masüba lemsatepogo aser iba telemtetba anema ken o benoktsü ta sangdongogo.

Sydney Sixers tekolakba Rachael Haynes-i ashiba agi, "Tom-i asa match official amokmerentsü memerang. Onoki onok temeden benshia iba telemtetba anema ken o benoktsü. Tenokdangba agütsür aliba mapang tsungda onoki Tom nongittsü aser pa yakta asaya tenzüktsü imlar."

Zimbabwe nunger cricketer asayar ana nem tenokdangba agütsü

Luchii/December 21, 2023 (Agencies): Zimbabwe nunger cricketer asayar Wesley Madhevere aser Brandon Mavuta na in-house doping test majangtetba sülen asaya nungi anentsüogo.

Zimbabwe Cricket-i ashiba agi, tena ya tenokdangba agütsür aliba recreational

drug amshiba puteta tenokdangba agütsüogo aser yakta obendangtsü.

Arishi küm 32 tain Madhevere ya linük tenung nungi Test ana, one-day internationals 36 aser T20 60 asayaogo aser Mavuta-a linük tenung nungi Test pezü, ODI 12 aser T20 10 asayaogo.

Tenaprongla iba ita

Ireland den asayaba ODI asayamung atema züngoksemer liasü. Iba asayamung ya Zimbabwe-i 2-0 agi makok.

Zimbabwe taruba küm T20 World Cup metongtetba sülen Head coach Dave Houghton-i Bodhbarnü mapa toktsüogo aser tang asayar ana asaya nungi anentsüogo.

Haaland nem World Sport Star of the Year naroküm agütsü


Luchii/December 21, 2023 (Agencies): Manchester City puri asayamung tongtibangtiba asem akokba nung teyari tulu agütsüba sülen Erling Haaland nem BBC Sports Personality indang World Sport Star of the Year naroküm agütsüogo.

Arishi küm 23 tain Norway nunger asayar yagi tetoktepa ajak nung goal 52 idaktsü aser pai teyari tulu agütsüba puri 2022-23 season nung Premier League, Champions League aser FA Cup kokogo.

Premier League club ka atema season ka nung asayar katidanga pa dang nung goal timba idakja mali.

2022-23 season nung Haaland-i asaya 38 nung goal 36 idakja pai Premier League's Golden Boot award ngua liasü.

"BBC World Sports Star of the Year atema kü nem vote



agütsüba asoshi kanga pelar. Taoba season kanga jangrademtsüka liasü.. ni asayamung asem kokogo aser onoki kanga junga asayaogo," ta Haaland-i ashi.

BBC World Sport Star of the Year award atema BBC Sport azüngertemi vote agütsür.

Pa sülen tanabuba jenjang nung rugby World Cup akokba South Africa team captain Siya Kolisi aser tasembuba nung Formula 1 world champion Max

Verstappen liasü.

Olympic gymnastics gold medallist Simone Biles, World Cup akokba Spain team nungi Aitana Bonmati aser Grand Slam 24 tashi koker alisang Novak Djokovic nungera iba naroküm atema nominate sür liasü.

Borussia Dortmund nungi 2022 küm June ita aruba sülen Haaland 2022-23 season nung mezüngbuba Manchester City nungi asaya liasü.

Pai Ballon d'Or awards nunga Gerd Muller Trophy for best goalscorer naroküm nguogo aser best player atema vote asüba nunga pa tanabuba jenjang nung liasü.

November ita pa ya Premier League nung goal 50 takaratiba idaktsüba asayar aküm. Pai iba season nunga goal 19 idaktsür lir.

Australia den Test asaya atema WI team sangdongogo

New Delhi, Luchii/December 21 (Agencies): Australia den Test asaya ana asayatsü aliba atema West Indies Cricket Board-i asayar 15 tenung sangdongogo, kong lanur asayartem aika lir aser parnok rongnung pezübo tang mezüngbuba asayatsü lir.

Jason Holder aser Kyle Mayers nunger amala tongtibang asayartemi franchise T20 cricket asayatsü shimba sülen team nung tang mezüngbuba Test asayatsüpur tenet densema lir.

Chief selector Desmond Haynes-i, asayartem mazüngba ajanga tetsükdaksü adokba nangzükogo, saka taoba küm tsungda red-ball program ka ajanga nguteta aliba sempet aketba lanurtemi junga asayatsü imlaba lemsatep.

Tongtibang asayar kar maliba ajanga team dak kongshioogo, ta Haynes-i ashiba den red-ball program ka ajanga


sempet aketba asayartem aika ngutetogo, ta shisem.

Tang mezüngbuba asayatsü alirtem rongnung batsman Zachary McCaskie, wicketkeeper Tevin Imlach, all-rounder Justin Greaves, Kavem Hodge, aser Kevin Sinclair, aser fast bowler Akeem Jordan aser Shamar Joseph nunger densema lir.

Test asayamung ya Adelaide Oval nung January 17 nü tenzüktsü aser tanabuba Test asaya Gabba, Brisbane nung January 25 nü nungi tenzükta asayatsü.

West Indies squad: Kraigg Brathwaite (capt), Alzarri Joseph, Tagnarine Chanderpaul, Kirk McKenzie, Alick Athanaze, Kavem Hodge, Justin Greaves, Joshua DaSilva, Akeem Jordan, Gudakesh Motie, Kemar Roach, Kevin Sinclair, Tevin Imlach, Shamar Joseph, Zachary McCaskie.

Sanjay Singh-i WFI tir election kokogo



yimya benshiba atema Brij Bhushan aitsü aser New Delhi kübok Jantar Mantar nung ita ishika longkak aita liasü.

Ajisüaka Sports Minister-i tenanzükba agütsüba sülen parnoki June 7 nü longkak aitba anena liasü.

Iba mapang Anurag Thakur-i, Brij Bhushan'er kinunger mesüra pa den kanga junga sendaktepa alir shinga WFI election nung metoktepdaktsütsü ta tenanzükba agütsü.

Executive council tasen shimba ajanga UWW-i WFI nem tenokdangba agütsür aliba agintsü asoshi lenmang lapoktsütsü. Election mapang shitak nung magiba atema UWW-i WFI nem tenokdangba agütsüba aser iba ajanga India nunger wrestler tem 2023 World Championships nung neutral asayartem ama toktepa liasü.

Kasa mapang nung Brij Bhushan den kanga junga sendaktepa aliba nisung ka tir kübok masayatsü ta shia Sakshi Malik-i la asaya nungi anenba Brehostibarnü sangdongogo.

Wrestling Federation of India (WFI) tir election Sanjay Singh-i akokba sülen lai iba telemtetba agia liasü.

Sakshi-i osangbenertem den sensaksem sentong toktsü aoba mapang la indang tsüngsem agizüker dais nung toktsü aser jeba ayazüka ao.

"Ni kanga mepelar aser ni wrestling nung ojang dang asayatsü," ta Sakshi-i ashi.

Luchii/December 21, 2023 (Agencies): Brehostibarnü the Wrestling Federation of India (WFI) tir election Sanjay Singh-i kokogo aser iba ajanga taoba tir Brij Bhushan Sharan Singh nem tema nungi iba lokti tentet ya azüoktsü asoshi lenmang lapoktsüogo.

Sanjay shiba UP Wrestling Association Vice President lir pai vote 40 angu aser pa den toktepla Anita Sheoran-i vote tenet ngua liasü.

Ajisüaka Sheoran'er telok nungi Prem Chand Lochab-i secretary general election kokogo. Pai Darshan Lal tsükdaksü.

Election result ajanga wrestlers Bajrang Punia, Vinesh Phogat aser Sakshi Malik nungeri Brij Bhushan anema longkak aitba ya amajok liasü ta bilemstü, kechiyong parnoki fraternity teyari mongutet. Tang BJP MP Bhushan den kanga junga dendaka aliba nisung ta tir kümogo.

Wrestler tem yagi, tetsür wrestlers tem dak mebenshitsü

BILEM DANGANG
"Pei mekümdangba ajanga tangar takoksadaksü."